

Na osnovu Programa utroška sredstava „Subvencija javnim preduzećima“ za 2009. godinu“ na koji je Skupština Bosansko-podrinjskog kantona Goražde dala saglasnost svojom Odlukom broj 01-14-467/09 od 19.05.2009.godine, Ministar za privredu Bosansko-podrinjskog kantona Goražde, d o n o s i:

P R A V I L N I K

o izvorima sredstava, uslovima, načinu i postupku dodjele sredstava po Programu „Subvencije javnim preduzećima“ za 2009. godinu“ sa uputstvom o radu komisije

Član 1.

Ovim Pravilnikom utvrđuju se izvori sredstava, uslovi, način i postupak dodjele sredstava po Programu „Subvencije javnim preduzećima“ za 2009.godinu (u daljem tekstu: Program), uputstvo o radu Komisije za dodjelu sredstava, organi i tijela za provođenje Programa, kao i način implementacije i utroška sredstava, te kontrola i mjere namjenskog utroška sredstava, kao i druga pitanja.

Član 2.

Za realizaciju Programa iz člana 1. ovog Pravilnika koristiće se sredstva utvrđena u Budžetu Bosansko-podrinjskog kantona na ekonomskom kodu Ministarstva za privredu Bosansko-podrinjskog kantona Goražde 614400-Subvencije javnim preduzećima za 2009.godinu u ukupnom iznosu od 85.000,00 KM koja će se dodijeliti putem Javnog poziva od strane Ministarstva za privredu.

Član 3

Pravo na dodjelu sredstava iz predhodnog člana imaju sva Javna preduzeća sa područja Bosansko-podrinjskog kantona Goražde registrovana u skladu sa Zakonom o javnim preduzećima i Zakonom o privrednim društvima sa sjedištem na području Bosansko-podrinjskog kantona Goražde, i to u sljedeće svrhe:

- podrška u radu i poslovanju kod pružanja što kvalitetnijih usluga građanima Bosansko-podrinjskog kantona Goražde;
- u povećanju broja uposlenih;
- podrška u sanaciji nepredviđenih zahvata na proizvodnji i distribuciji vode;
- pomoć Javnim komunalnim preduzećima kod planiranja i izdvajanja sredstava u cilju obnavljanja objekata, postrojenja i opreme, kako bi preduzeća mogla obavljati osnovnu djelatnost;
- podrška za projekte zaštite ljudi i životinja predvođena Zakonom većeg nivoa vlasti;
- podrška pri rješavanju statusnih pitanja radnika, njihovo zadržavanje na poslu;
- održivost postojećeg stanja.

Član 4.

Kao korisnici ovih sredstava, mogu biti sva Javna preduzeća čija je osnovna djelatnost pružanje usluga građanima Bosansko-podrinjskog kantona Goražde, shodno Zakonu o javnim preduzećima po sljedećim uslovima:

- da su registrovani na području Bosansko-podrinjskog kantona Goražde u skladu sa Zakonom;
- da su im uposlenici u stalnom radnom odnosu;
- da posjeduju Investicioni program sa svim potrebnim elementima i fazama realizacije;
- da su do sada opravdali i namjenski utrošili sredstva dodijeljena od strane Bosansko-podrinjskog kantona Goražde

Član 5.

Sredstva utvrđena u članu 2.ovog Pravilnika u iznosu od 85.000,00 KM će se dodijeljivati putem Javnog poziva koji objavljuje Ministarstvo za privredu Bosansko-podrinjskog kantona Goražde. Javni poziv će biti otvoren najmanje 15 dana i isti će biti objavljen na službenim oglasnim pločama Bosansko-podrinjskog kantona Goražde i sredstvima javnog informisanja, a sve u cilju zadovoljenja načela javnosti i transparentnosti dodjele sredstava, a potencijalni korisnici sredstava će u roku objavljenom u Javnom pozivu moći aplicirati za dodjelu sredstava.

Za provođenje Javnog poziva formiraće se komisija za prihvatanje, otvaranje i ocjenu Investicionog programa za korištenje sredstava po Programu „Subvencije javnim preduzećima“, a komisiju će svojim aktom formirati Ministarstvo za privredu Bosansko-podrinjskog kantona Goražde uz saglasnost Vlade Bosansko-podrinjskog kantona Goražde, koja će brojati 5 (pet) članova.

Član 6.

Komisija iz člana 5. ovog Pravilnika će raditi u skladu sa Programom, ovim Pravilnikom i Javnim pozivom a odluka komisije će se donositi na sjednicama komisije koncenzusom ili većinom glasova svih prisutnih članova komisije.

Komisija ima ovlaštenje da u slučaju nejasnoća iz dostavljene dokumentacije, Investicionog programa, zatraži određena pojašnjenja od strane ovlaštenih osoba Javnih preduzeća, a ista nema pravo sugerisati ili samovoljno vršiti bilo kakve izmjene ili druge tehničke ispravke u dostavljenoj dokumentaciji.

O svom radu Komisija je dužna da vodi zapisnik i da na kraju svog zadatka sačini izvještaj o radu.

Tačni zadaci, rok izvršenja zadatka , kao i ostale pojedinosti u radu komisije odrediće se u aktu o formiranju komisije.

Član 7.

Za provođenje programa kao i za ostale aktivnosti na realizaciji istog biće zadužena radna tijela, odnosno komisije, Ministarstvo za privredu, Ministarstvo za finansije i Vlada Bosansko-podrinjskog kantona Goražde, svako iz svoje nadležnosti.

Član 8.

Konačne odluke oko raspodjele odnosno dodjele svih sredstava donosiće Vlada Bosansko-podrinjskog kantona Goražde na prijedlog resornog Ministarstva odnosno radnih tijela i Komisija.

Član 9.

Ovaj pravilnik stupa na snagu danom stupanja odnosno donošenja Programa utroška sredstava „Subvencije javnim preduzećima“ za 2009.godinu i isti je njegov sastavni dio, te će se objaviti zajedno sa programom .

MINISTAR

Mustafa Kurtović prof.

Broj: 04- 14-1152-3 /09
Goražde, 06.05.2009.godine